



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Jovis decimo-sexto
Aprilis, anno M. DCC. L.*

M. CAROLO-FRANCISCO BOUTIGNY DES PREAUX,
Doctore Medico, Præsides.

An diu possit homo, sine cibo potuque, & vivere & valere?

I.



INGULA humanæ machinæ instrumenta pervolve. Intima ipsius scrutare penetralia. Præter extructam solidis fluidisve compagem, nil quidquam occurret indagini tuæ. Reciproce in sese invicem impetat, luctet & quasi circa equilibrii punctum moveatur duplex illud partium genus: jam hæc ponitur physica conditio quâ vivit homo. Si æquabilis ubique, expedita, integra ac perfecta fuerit hæc alternatio motûs; illic præsens consalutanda sanitas, bonorum omnium exoptatissimum. Ubi vero vel in unico organo languida, inæqualis, perturbata, impedita reciproca illa solidorum ac fluidorum actio; morbus adest, acerbum & heu nimium! frequens humanæ gentis flagellum.

A

Si tandem ubique corporis sufflaminatus ac prorsus extinctus sit alternus hic & vitalis partium nisus, jam exarata ultima linea rerum, totumque corpus amara mors tenet. Summi opificis penitus oppositos ab unâ eâdemque causâ effectus eruentis ineffabilem hic sapientiam agnosce, suspice, venerare. Quo motu nascitur homo, vivit, viget, floret, eodem fatiscit, senescit, properatque ad interitum. Etenim commota indefinenter vascula, assiduo franguntur detritu, brevique collabascunt. Fluida verò continuo quo aguntur trusili motu, per patulos exitus uberrimè è corpore fusa ac penè exhausta, vasculosum systema cui proluendo ac dilatando dicata, propemodum inane relinquunt. Horum pars superstes tot repetitis contrita solidorum ictibus, accenditur, mitem exuit indolem, exasperatur, acris, volatilis, putredini proxima fit. Solo igitur vitali solidorum & fluidorum motu, tota citò pessum iret machina, lethoque maturiori occumberet, nisi imminentem hanc ruinam congruente pabulo provida cavisset natura. Hoc cibo potuque identidem subministratum, debitum liquidi penu suggerit, nativani ipsius blanditiem fovet, putridamque & alcalinam ejusdem corruptionem avertit, assidua denique solidorum dispendia sarcit, & ita ad certum usque tempus vitales prorogat motus. Num poterit unquam humana machina, tam necessario sustentaculo, vitâ superstitè diu defraudari? Minimè quidem, nisi stupendis de causis liquida, negato exitu, sufficienti copiâ vasis coërcita maneant; simulque generalis ille retundatur impetus, quo tam citò & ad putredinem vergit universa liquidorum moles, & jugi ramentulorum abrasione tota deteritur vasculorum compages. Hunc autem statum reipsâ occurrere posse concipitur. Eundem verò morbosum nec unquam vigente sanitate reperiendum agnoveris, qui portentosus & à naturali humani corporis habitudine alienus. Ex quibus sic prælibatis, nuncque fusiùs paulò explanandis intricatæ hujusce quæstionis elucidatio spontè fluat.

I. I.

De aëris &
alimenti de-
fectu, &c.

NO S hinc inania tantummodò & merè hypothetica confectari, Junonem, ut aiunt, in nube quærentes, ne judica præceps; nec cuncta inediae portenta, tanquam commentitia, leviter ac sine delectu explode. Si enim doctissimum, ut par est, PECHLINUM audiamus, *Tot virorum eruditorum testimoniis argumentisque probata est abstinentium historia, ut qui illam inficiari ausus sit, etiam meridiani solis lucem negare videri velit.* Innumera profectò hic congerere fas esset exempla hujusmodi, ex LENTULI, LICETI, PECHLINI, SCHURIGII, aliorumque operibus, tum & ex variis Europæ diariis ac scientiarum commentariis facillè depromenda. In tantâ copiâ, pauca, sed certa ac fida seligere præstat. Missio igitur fabuloso philosophi EPIMENIDIS somno, pari jure neglectis septem dormitoribus sub VALENTINIANI imperio, necnon consultò prætermisissis quæ ab ocularibus testibus non traditæ, optato carent certitudinis gradu, perpeffi per 15. 18. 20. 22. 30. 36. 40. annos perfecti jejunii historiis, ea primùm annotare consentaneum est, quæ incredulis injucunda minùs. Plures ab omni cibo diu abstinuissè, solumque potu sustentasse vitam, certo certius est. Sic Canadenses sylvarum incolæ aquâ solùm & tabaci fumo diutissimè famem depellunt. Sic in Melitensi insulâ, plurimi ægrotantes solâ propinatâ per multos dies glaciali aquâ, non vixere tantùm, sed & convaluere. Unico aquæ potu, hebdomadarum septem spatio fuit enutritus Colonienfis ille melancholicus cujus meminit ALBERT. magnus. Harleimens quidam maniacus per 40 dies jejunavit nicotianæ fumo & aquâ pro colluendo ore solummodò usus. Per universam tandem Galliam famâ pervagatum est piissimum illud Senonensis Benedictini patris LEAULTE' jejunium, cui per viginti & ultra annos, toto quadragesimali tempore, præter aquam & vinum in Sacro celebrando hausta, nil aliud cessit in nutrimentum. Nec id observationum genus recensentes à scopo aberravimus. Si non evertat, saltem movebit incredulorum pertinaciam, hosce ad sequentes absolutæ inediae historias benigniùs excipiendas sensim aptabit. Quis eorum debitam magno FERNELIO nostro audebit denegare fidem, cum se vidisse narrat gravidam mulierem cujus supernum ventriculi orificium schirro impeditum liquidis sicut & solidis omnem præcluserat viam, quæve sic invitè jejunans vixit adhuc per bimestre spatium. Nec exempla desunt hominum qui sub dirutis ædificiis aut in antris subterraneis diu quasi conscripti delituere, quin fame perierint. Non pauci etiam in Cochinchinæ regno deprehenfi sunt, qui Christianæ religionis ergò carceribus inclusi, omni alimento orbat, sicque certissimæ morti damnati, horridam hanc famem sitimque per plures menses pertulere. Percelebris Consoletanea abstinentis observanti CYTHESIO à quo tradita ipsius historia, hæc phenomena successivè exhibuit. Febrem ac vomitum. Loquelæ amissionem. Delirium. Partium capiti subjectarum, faucium imprimis paralyfim cum ciborum horrore sex mensium spatio sævientem. Motum postea in membris restitutum. Superstes cujuscumque alimenti fastidium. Abdominis complanationem & atrophiam. Reliqui corporis plenum satis habitum & incrementum. Lingvam abbreviatam. Cohibitum omne excretionum genus. Cutim aridam, frigidam, nec motu

incalescentem, nec unquam sordibus conspurcatam. Hæc ab omni cibo & potu per tres annos & ultra abstinuit. Puellam vidit Patavinus Professor Alexand. VIGUNTIA, quæ febre primùm, dein brachii sinistri tumore, ac demum ventriculi, totius abdominis, & articularum dolore obsessa. His successit brachii sinistri paralytis, cum violento cujuslibet ingesti vomitu. Nau-seabundus inde omnis alimenti horror. Subtractum idcirco quodcumque pabulum. Hinc quancumque excretionum suppressio. Sic binos vixit menses non marcescens, sed floridam satis faciem gerens. Tunc exhibito pulvere quemdam cum lumbrico vivo evomuit humorem. Persequens trimestre singulis ferè diebus, primùm per alvum, dein per vomitum copiosè satis erupit mor. Engatam postea brachii paralytim excepere cæcitas ac desipientia, & ita per octo menses, penitus jejunam duxit vitam catalepticis aliundè insultibus sapissimè percussam. Sensum tamen restituta & ingestio & egestio. At paulò post fatali redeunte vomitu cætera revixere symptomata, & renata inde altera perfecta ac bimestris inedia. Celebres inter hæc jejunantes micat APOLLONIA SCHREIERA, quæ PAULO LENTULO eruditi operis suppeditavit argumentum. Hæc cum deperdito sensim cibi potusque appetitu & usu, menses aliquot prorsus impasta transegisset, senatùs Bernensis jussu, in nosocomium traducta, ubi diligentissimum cui diù subjecta fuit examen, integram ipsius inediam posuit extra dubium. Compressum fuit in eâ quodlibet excretionum genus. Contabuit simulque induruit imus venter. Languidum & quasi paralyticum musculorum omne systema. Totum corpus stupore gravatum, ferè impar erat motui. Adeò hebes in extimâ cutè sensus, ut repentes in facie muscas non deprehenderet, nec rigentis brumæ frigus adverteret accerrimum. Jam ad duodecimum usque annum stupendum illud protractum fuerat jejunium, cum alimenta appetere & ingerere cœpit, sensimque abactis singulis prædictis symptomatis, pristina restituta fuit sanitati. Nec ibi reticenda puellæ è loco *Pallet in Burgundia* comitatu observatio, quæ è curru in terram violenter excussa, quadrupedante equorum ungulâ leviter in capite ac cervice quassata, & transilientibus rotis in dorso circa undecimam vertebra vehementissimè concussa, cruento primùm vomitu, febre dein periculosissimâ, diris doloribus, brachii sinistri paralyti, inappetentiâ, contumaci pervigilio, accuratâ tandem imarum faucium constrictione conflictata, per biennium & ultra, præter sacchari & condituræ liquidæ modicum, panis miculas aliquot & binos aquæ cyathos, nil quidquam ingessit. Hæc postea per quatuordecim menses nullas omnino tetigit dapes, satis habito manente corpore, febriculam, levesque identidem patiens sudores, nil per alvum & vesicam excernens, nec unquam, quod mirum, consueto orbata catameniorum profluvio. Medica Societatis Edimburgensis acta insolitam exhibent junioris puellæ abstinentiam à gravi mœrore & inde ortâ mensium suppressione primordia ducentem, & vomitu primùm ac convulsivâ gulæ coarctatione incautè sumpto emetico accersitis, spasmodico dein totius corporis statu, præsertim frequenti tetano, cæcitate, surditate, tandemque lethali marasmo stipatam.

Nisi angusti vetarent hujus scripti limites, non pauca alia id genus exempla addere promptum esset. Horum claudat agmen miranda prorsus Virginis Vivariensis historia quam inviscere, alloqui, & accuratissimè explorare licuit. Hæc à teneris annis rustico dedita labori, hystericos insultus, colicam nephriticam, vomitam pulmonum, parùm prosperum catameniorum fluxum, aliaque non levia perpeffa fuerat mala. Sinistro casu in fluentem rivum ex alto prolapsam statim corripuit pleuritis consuetis expugnata præsidiiis. Hanc excepit ischuria cum violento ac pertinacissimo vomitu, quæ quadamtenus fugata. Accessit hemiplegia brevè in paraplegiam desinens. Tunc præclusâ gulâ, solitum victum sibi denegare coacta ægotans. Naturalis quæcumque evacuatio inde suppressa. Occæcata dein vi morbi misera Virgo, ipsique obscuruit antis una. Identidem per plures continuos dies primùm non parùm cruoris, postea tantillùm puris stillavit ex aure sanâ. Hoc stillicidio cessante, visus nonnquam ex inflammatâ inammâ guttatim exudare sanguis. Uterque ille fluxus quatuor prioribus inedia annis sæpè recurrens, totidem ultimis rediit nunquam. At singulis annis vernâ tempestate erumpens sputum cruentum oclusam alimentorum viam periodicè sed levissimè referavit, ita ut lactinæ, aut alterius oleris, aut panis azymi frustula minima, vel aliquot aquæ guttulas, tunc deglutire liceret, quæ sæpè vomitu rejecta, quandoquæ tamen retenta, quæve in vacuum prolabendo ventriculum, strepitum quemdam edebant, quasi in profundum puteum demergerentur. Verùm brevè post penitus arctabatur iter, nonnisi sequenti anno pari tempore, consimilique ratione recludendum. Subucula quâ contegebatur famosa hæc abstinens, tum & indusia inter quæ jacebat ab octo annis, non squallore scedata, sed usu tantùm detrita videbantur, nec unquam stratum cui perpetuò fuit affixa, putridum exhalavit odorem. Singularis hic status à prægressis affectibus virginem non exemit. Nephritico dolore fuit aliquoties afflicta, pluresque calculos ingenti cum cruciatu, nullo profluente urinoso latice, reddidit. Violentus etiam contigit ipsi vomitus, pituitosæ materiæ vermiculis

Journal
des Sçavans
Mars 1688.

Tom; VI.

D. de Ville-
neuve, nunc
Episcopi
Monspel.

nonnullis interspersæ. Singula hæc à probo & perito Medico teste oculari edoctus, simul cum eo abstinentem nostram invisi die vigesimo-quarto mensis Februarii anni 1745. Hanc in humili & obscuro cubiculo lecto decumbentem reperii. Naturalis ipsi inerat facies, cum satis pleno universi corporis habitu. Pulsus erat lentus, exiguus, ritè ordinatus. Præcipiti motu nictitabant palpebræ. Musculus temporalis sinister perpetuo convulsivo motu quatiebatur. Arida, aspera, albicans & abbreviata lingua. Cutis frigidiuscula & satis flexilis. Motu sensuque orbata visa sunt membra. Quæstis meis ingenuè respondens retulit se vix horâ unâ somno indulgere per totam noctem, ferè continuò dolere caput, quandoque pectus, at sæpius multò scrobiculum cordis. Collapsum aridumque abdomen manibus contrectavi sed præsertim ventriculi regionem depressam & rigidiorē. Violentam huic quamvis non intulissem pressionem, sequenti manè tamen de ejusdem regionis sæviori dolore conquesta est. Sub Septembris finem, convulsionibus, pectoris oppressione vocem adimēte, perpetuoque vomitu divexata per plures dies, vermes adhuc multos ejecit. Ingenti conatuum vi obseratam pandente viam, uberrimè hausit aquam, & quædam alia ingessit; at hæc quancitò vomitu sursum efferebantur. Postremis vitæ suæ diebus, fluxilem, Caffè decocto similem, & emplastrum epigastricæ regioni admotum redolentem materiem excrevit, necnon paralytica membra movit aliquantulum. Tandem 14. Octob. die obiit. Stupendam hanc historiam veram, certam, & ab omni fraudis suspicione immunem esse comperiit plurium fide dignorum, ac præsertim Reverendissimi Episcopi Vivariensis diligentissima observatio. Qui singula hujusmodi exempla negaverit audax, numerosam doctrinâ morumque integritate insignium virorum cohortem, levitatis, aut ignorantia, aut improbitatis necesse habet insimulare.

I I I.

VEGETABILE Regnum, ac multiformem animalium familiam attentis intueri oculis, nec tibi monstrum erit incredibile humana inedia; nec eam reputabis mentis figmentum. A telluris consortio semoti bulbi sponte suâ singulis ferè annis in aère adolēscunt. Similiter & nonnullæ plantæ à terrâ matre ablactatæ fornicibusque in alienos usus suspensæ, injussæ virescunt, progerminant & vitæ vegetabilis testantur robur. Si ergò organicum plantæ corpus solito maternoque pabulo viduatum, possit adhuc propriâ sibi vitâ potiri; cur organica pariter humana machina, consueto victu subtracto, certis in casibus, vitæ suæ compos non esset? At vivax illud & mobile regnum properemus perlustrare, cujus pars magna sumus. Nec statim contemptum pariat humilis & pusilla insectorum moles; nullibi enim magis enitet adoranda summi numinis sapientia. Hæc autem rigente hyeme, abdita, consopita, immota, jejuna, ac velut extincta manent, quousque gratâ vice veris, renovato calore reviviscant, & in liberum vitalibusque effluviis perfusum se vindicent aërem. Sic provida formica, tam sollicitè non pabulum sibi, sed stratum comparat quo suum hyemalem commodè possit obire somnum. Industrios hosce vermes sedulò considera, qui sepulchralem domum tantâ cum solertiâ sibi nectunt & exstruunt, quâ vivi sepeliuntur, diutissimèque reconditi, impasti ac velut mortui sub chrysalidum aut nympharum nomine latent, qui tandem congruo calore foti funebrem perrumpunt thecâm, resurgunt alacres, & novâ, elegantiori sæpèque variegatâ formâ indutos, verbo papiliones se exhibent. Jam erecto vultu per aëra volitantem conruiere avium turmam. Harum major pars semestri duplici distinctam degit vitam. Altero vividè agunt, latè moventur, celeri volatu paragrunt æthera; dulcedine cantûs sese invicem mulcent, nidulos ædificant, sæpè ruunt in amatorios amplexus, concipiunt, pariunt, pullulos educant, optatisque & avidè conquistis dapibus se satiant, alternâ alioquin requie se reficientes. Per aliud verò semestri spatium, suis occultatæ latebris, sibi invicem implicatæ, ac convolutæ aviculæ, perpetuò quiescunt, torpent, soporantur, jejunant, nec nisi in interioribus vivunt mortuis extris similes, donec jucundo reditu veris recalescant & quasi renascantur. Nec infrequens est pisces etiam mediis in undis frigore nimio obtorpescere, latere, ac velut immori, imò & glacialibus ramentis obducî. Id quoque de amphibiiis notum; ea Hyberno frigore constricta & corrugata cryptis recondi, silere, altoque sepeliri somno, ut serpentes, bufones, lacertæ, &c. At notiora adhuc Hyberna quadrupedum latibula, in quibus alia unam & perpetuam obdormiunt hyemem, alia verò certis periodis movent se, iterumque ad somnos se componunt. Verùm id certissimum est erinaceos, glires, alpinos mures, aliaque hujus familiæ animalia, ut inimicissimo hyemali frigori se subducant, cuniculis abdi subterraneis, collecto in orbem corpore obdurari, & somno immergi adedò profundo mortisque æmulo, ut eum verberibus, ferro, igne vix excusseris. Nec crede ea solummodò diù jejunare posse animalia, quæ totam hyemem stertunt. Serpentes absque ullo pabulo in vase coërcitos, sex mensium spatio & vivere & moveri expertus est AMBROSINUS. Observante oculatissimo REDÏ, superstite vitâ motuque inediâ ferunt feles 20 dierum, canes 36. vipera octo mensium, testudines tandem mensium 18. Ipsa velocissima animalia, quæ pernici-

7
motu jactant corpus ; cerastes putà ; draco , salamandra , chameleon inedia patientissima feruntur. Hinc sparsus error ultimum hunc solo aëre victitare. Ut harumce observationum vis unita tutiori momento pertinacem expugnet incredulitatem , hæc altâ mente perpende. Animalis cujuscumque sicut & hominis corpus machina est hydraulica ex vasculis fluidisque per ea traductis conflata. Utriusque vita in alterno harumce partium motu. Ut structura eadem , sic eadem mechanica ratio in utroque. Quæ igitur tamdiu ab animali vivente toleratur inedia , certæ solidorum fluidorumve mutationi haud dubiè tribuenda. Quis ergò sanæ mentis physicam hanc conditionem in humano corpore omninò impossibilem esse affirmaverit ? Eandem quis negaverit esse præternaturalem ?

I. V.

HUMANÆ igitur inedia exempla fidâ nonnunquam observatione prodita fuisse ster inconcussam. Eadem ductis ex analogiâ argumentis firmari , sit pro comperto. Nec hisce jam consulenda refragabitur ratio. Age porrò , abstrusum atque reconditum stupendi hujusce phænomeni strenuè perquiramus fontem. Quo pacto in humano corpore nullo cibi potûsque genere instaurato , sat fluidi superest ad amplianda vasa , & ad circularem ac vitalem motum saltem in nobilioribus organis diù fulciendum ? Deinde verò debitâ quamvis copiâ occurreret in jejuno corpore fluidum , quâ sit ut non novatum ab illâ alcalinâ putridâve corruptione tamdiù persistet immune , in quam motu , calore , nativâque indole aliàs tam citò vergit ? Hæc duo nunc operosè excutienda. De priori sollicitam reperies scriptorum turmam. Ultimum dubio procul magis intricatum vix subolfecere nonnulli , nemo quod sciam , ex professo tentavit enodare. Ut primum haud infelici expediamus eventu , supra depictum quorundam animalium periodicum ac semestrem somnum præstat intueri diligenter. 1°. Hunc ciet hostile frigus. Corporis autem cujuscumque densare molem frigori proprium. Stringit ergò & occludit penitus cutanea horumce animalium spiracula. Sic excretionum uberrimam cohibendo , debitam servat in iisdem fluidorum copiam , ut intus pergat adhuc aliqualis vasorum motus. Indè igitur conjicere pronum est , præsertim ob compressam penitus insensilem perspirationem , jejunum hominem requisito ad vitales motus fluidi penu non spoliari. 2°. Frigus illud quo animalia obtorpescent , non perspiratorios solummodò ductus , sed & alios adhuc obstipat externum corporis habitum alluentes , liquidorum partem condensat , aliam repellit introrsum , sic vasculosum systema minuit & abbreviat , cui proindè replendo ac peragrandò multò minor fluidi moles haud impar erit. Si ergò illud idem in pluribus humanæ machinæ vasculis contingeret , vitales ipsius sustinere motus potius esset parcius humorum copia. 3°. Sic sopitum animal , extincto similè nullum certè motum edit. Motu verò subtilissimum & spirituosum avolat è liquidis , quo depauperatum animal fatiscit. Tantam ergò non patitur jacturam , ubi cuncta ipsius prostrata sopore urget membra quies. Si igitur voluntario motu orbaretur homo , si morbo quopiam sed præsertim paralyti strato affigeretur ; sic ferè immobilis jacens , minusque spirituosus deperdens , vix iteratâ indigeret instauratione. Quæ tria sic prænotata caliginem hinc abigunt , maximamque scelerant lucem. Apprimè enim cum præcipuis humanæ inedia phænomenis concordant. Id autem statim singulari dignum attentione occurrit , muliebrem sexum omnia ferè prodigiosa abstinentiæ exempla præbuisse. Unde nodo huic extricando proderit ritè intellecta feminini corporis textura peculiaris. Cui verò notum non est , illud masculino humidius , laxius , debilius , parum exercitatum , multò minus perspirare , ac superfluo redundare sanguine cujus periodicum effluxum exposcit integra sanitas. Ne miremur igitur , mulieres non solum parcius sustentari cibo , ac per hebdomadas à potu innoxie abstinere posse , verum etiam perfecto jejuniò diu ferendo aptiores esse. His adde celebres hæc abstinentes quarum historiæ litteris consignatæ prostant , plerasque puellas fuisse mox puberes , in quarum idcirco corpore ultimum incrementi sui apicem recens adeptæ , necdum satis obfirmato uberius excrescunt succi , nec eadem ratione funduntur è corpore excrementa. Nunc verò revoca in memoriâ singulis ferè jejunantibus , modò aridam esse cutim , modo frigidam , sapissimè insensilem , nec plerumque ipsi superjecta sordescere lintea. Hæc profectò penitus interceptum arguunt halitum insensilem. Concludere ergò ne cuncteris , hujusce excretionis omnium certè copiosissimæ compressionem , debitæ fluidi moli intra corporis penitiora retinendæ , proindèque diuturnæ fovendæ inedia potissimum conferre. Hinc diu sinè alimento vivunt , quæ ferè imperspirabilia sunt animalia , serpentes putà , viperæ , testudines , &c. Jam intentâ mente perpende humanæ inedia ferè semper comitem fuisse paralyticum quemdam affectum. In hoc autem plurimi tubuli nervei , fortè & non paucæ arteriolæ sanguinæ ac lymphaticæ consueto liquidi sui appulsu orbantur. Hosce totidem ductus , tanquam ex universo vasculoso symptomate demptos concipe , ut res est. Quod liberum superest & patens , proluet movebitque parcius multò liquidi copia. Id tandem sedu-

ferè decubitus, tandemque tot canaliculorum obturatio, somno quadamtenus equivalent. Sic superficierenus obstipata, nec fluidis perfusa humana machina, chrysalidis instar nonnisi internam sed miseram agit vitam, pluribusque sensum labefactata malis plerumque vergit ad interitum. Animalia è contra alacria ut plurimum ac satis vegeta ex periodico suo somno resurgunt. Adde jejunum hominem libero perfrui & assidue instaurari aëris usu, quo certè carent pleraque soporata cavernulisque subterraneis abdita animalia. Reminiscere denique non solum diu ferre inedia, quæ totam obdormiunt hyemem, sed quæ sapissime moventur ac vigilant. Manet ergo inconcussum id rationis momentum quod suppeditavit analogia. Nec minus firmo stabit talo superius adducta Theoria. Quod primum de excretionum omnium integrâ compressione prolatum, non evertent cruenta quæ nonnullis in abstinentibus puellis observata fuere profluvia. Hæc enim angustatum vasculosum systema, respectivam succorum redundantiam, & vim vasculis quibusdam interioribus illatam arguunt, proindeque explanationi nostræ potius favent quàm adversantur. Id pariter perstabit invictum, quod jam antea à nemine observatum, tantâ cum curâ connotatum fuit à nobis de frequentissimo paralyseos cum humanâ inediâ concursu, licet in eâ convulsivum affectum prævaluisse, quandoque visum fuerit. Nullum enim later vel leviter in Pathologicis versatum, spasmo constringi vascula. Potuit ergo hoc in casu, cutanea spiracula, aliosque complures canaliculos exteriores omnino præcludere, vasculosum systema sic abbreviare, & fluida interiora versùs repellere. Nec prætermitte hujus generis affectum ægrotantes persæpe lecto affigere, sensuum organis non raro naturalem prorsus adimere usum, tandemque in atoniam imò & in paralysem haud ægrè commutari; quæ quidem in abstinentiâ spasmo sociatâ contingere. Ultimò tandem insurgent refragantes. Quâ singulari & inauditâ prærogativâ, patuli supersunt pabulum aëreum excepturi ductus absorbentes, ubi perspiratorii omnino occlusi? Gravem hanc objectionem non arduo labore dilues, si excretoria quæ insensilem eructant halitum, è genere arterioso, quæ verò alibilia aëris miasmata sorbent vascula è genere venoso esse statim annotaveris. Primum enim genus ingurgitationi magis obnoxium esse, cuilibet notum. Dein adverte verosimiliter majorem absorbentium canaliculorum amplitudinem, fortè & infundibuliformem figuram, non solum volatilis alimenti ingressui favere, sed & eosdem ab integrâ angustatione eximere. Specta demùm, ut par est, tanquam vires sibi mutuò contranitentes, fluidi à centro ad peripheriam impulsu momentum, & aëris atmospheram assiduâ pressione corpori innitentem. Haud dubiè remittit illud in hoc casu, cum & parciore rivo, & languidiori impetu fluidum urgeatur. Interim pressio aëris profectò manet eadem. Hæc ergo particulas nutritias uberius in tubulos absorbentes intrudet, cum debilius diducta vicina vascula minus obstant. Unde sensim ultima coarctari, priores verò magis ac magis ampliari necessum est. Sic viventem humanam machinam, vegetabile corpus haud immeritò diceres. Non enim amplius suscepto intus pabulo reficitur, sed per patentes extrâ radices nutrimenta sumit. In hoc tamen plantæ dissimilis, quod perspirationis & suctionis non patiatur alterna, verùm quicquid alibile vehit aër, perpetuò avidèque sorbens, ferè nihil unquam in beneficium ipsius sinum refundat. Assiduam hanc & fortem jejuni corporis suctionem innuere videntur duo in abstinente Vivariensi observata, promptissima scilicet emplastri epigastricæ regioni appositi exsiccatio, & excreta per alvum, paulò antè obitum, materies topicum illud perfectè olens. Num arida & rugis arata senum cutis subtili huic exsugendo cibo expeditior esset? Id suaderet experimentum quo constitit aërem per corticem arborum vetustiore liberius transmitti. Jam verò omnibus hætenus expositis, non tam tutò ac feliciter jejuno corpori refovendo provisum fuisse autumamus, ut de indagandâ causâ ipsius ruinam sensim moliente solliciti simus. Vitam quidem descriptâ mechanicâ ratione ducit humana machina nullo refocillata sensibili alimento, sed singularem prorsus, morbosam, luctuosam, dimidiatam, & ut plurimum malorum conflictatam iliade, mortique propinquam. Quid ambigis adhuc? Haud mora, animosè sic concludere est in proclivi:

Diu ergò potest homo, sine cibo potuque, vivere quidem, non verò valere.

Proponebat Parisiis, FRANCISCUS-DE-PAULÂ COMBALUSIER, Bursandeolensis apud Helvios, Doctor Medicus Monspeliensis, Antiquus Medicinæ Professor, nec non Saluberrimæ Facultatis Medicinæ Parisiensis Baccalaureus, A. R. S. H. 1750, à sextâ ad meridiem.

Typis QUILLAU, Universitatis & Facultatis Medicinæ Typographi, 1750.